

Muslimin dan (3) dari badan-badan Islam bergabung yang membantah kuat di dalam pelaksanaan rang undang-undang itu sedang bantahan UMNO samar-samar.

Kita tidak dapat melihat apa faedahnya yang didapat oleh kerajaan menglaksanakan rang undang-undang Islam ini dengan tergesa-gesa tetapi kita memandang mungkin ada, yang diharap tidak akan ada, serta ditakuti bencana-bencana yang bakal timbul daripadanya.

Sepatutnya pihak kerajaan mestilah tenang di dalam soal yang seperti ini terutamanya kesan-kesan daripada peristiwa-peristiwa yang berlaku di Singapura yang kita rasa masih ada lagi benih-benihnya yang belum hilang dan kerana itu pada pendapat perbuatan tergesa-gesa itu ditakuti akan menanam ke dalam perasaan umat Islam akan perasaan tidak puas hati dan dengan mudahnya boleh digunakan oleh golongan-golongan yang suka mengambil peluang di dalam soal-soal yang seperti ini bagi mencetuskan suatu peristiwa yang tidak membawa faedah sama ada kepada kerajaan atau kepada umum. Kita harap yang demikian ini tidak akan terjadi dan dijauhkan

Allah – amin.

* * *

Di Sekitar Kongres Kemajuan

Islam di Malaysia

Kongres Kemajuan Islam di Malaysia yang telah diadakan di Dewan Tengku Canselor Universiti Malaysia pada 6 dan 7 Ogos 1966 telah tamat dengan membawa beberapa cadangan-cadangan yang terbit daripada perbahasan-perbahasan yang panjang di atas lima buah kertas kerja yang dikemukakan oleh beberapa badan-badan persatuan dan

orang perseorangan. Kertas-kertas kerja yang dikemukakan di situ diberikan sehari sebelum sidang dan kerana itu mungkin banyak fikiran-fikiran yang secara mendalam tidak dapat difikirkan di dalam masalah-masalahnya terutama di dalam pelaksanaan-pelaksanaan perkara-perkara yang bakal diputuskan itu.

Dalam penamat persidangan itu suatu badan kongres untuk menglaksanakan segala keputusan-keputusan kongres telah ditubuhkan dengan nama “Himpunan Pendukung Islam” (H.P.I.). Cadangan ini terbitnya daripada pendapat-pendapat dan fikiran-fikiran dari perancang kongres itu sendiri. Kertas-kertas kerja yang dibahas terkandung di dalam lima bahagian yang di bawah ini:

1. Pendidikan Islam di Malaysia.
2. Penyatuan Pentadbiran Agama Islam di Malaysia.
3. Islam di Nusantara.
4. Dakwah Islam di Malaysia.
5. Islam dan Kebudayaan.

Di dalam bahagian 1 (Pendidikan Islam di Malaysia) perkara-perkara mengenai dengan menyatukan pelajaran dan peraturan di sekolah rakyat dan pondok dikehendaki supaya dijalankan dan sebuah sekretariat pertadbiran sekolah-sekolah agama rakyat dan kerajaan patut diadakan. Untuk itu nampaknya satu pusat latihan guru-guru agama disyorkan supaya didirikan dengan melupakan sama sekali perkara yang mustahak iaitu mengadakan sekolah-sekolah normal guru-guru agama, kerana dengan demikian dapatlah mereka menghidupkan cara didikan yang sempurna. Di antara perkara-perkara yang mustahak mendapat perhatian dalam urusan yang diberi oleh bahagian ini ialah:

1. Pelajaran bahasa Arab dan al-Qur'an di sekolah-sekolah agama patutlah diberi perhatian yang sungguh-sungguh.

2. Pendidikan Islam di masjid-masjid dan surau-surau patutlah disampaikan oleh mualigh-mualigh yang terlatih, kerana itu pusat mualigh patut didirikan.

3. Pendidikan Islam di kelab-kelab belia, pertubuhan-pertubuhan dan yang seumpamanya patut digalakkan.

4. Masjid-masjid dan surau-surau patutlah mengadakan kursus-kursus agama dan kutubkhanah yang mengandungi buku-buku agama dan ilmu pengetahuan yang lain.

5. Penerbitan buku-buku agama yang menggunakan bahasa Melayu yang mudah difahami oleh segenap lapisan masyarakat patutlah diperlipat gandakan.

6. Penerbitan buku-buku yang sesuai untuk bacaan kanak-kanak patutlah diperbanyakkan.

7. Ruangan agama di televisyen patut dilanjutkan dan acara-acara yang lebih menarik hendaklah diadakan.

8. Penyiaran radio patutlah menambah dan memperbanyakkan lagi pensyarah-pensyarah agama.

9. Universiti Islam secara berasingan patutlah didirikan dan Kolej Islam Malaya sebagai terasnya.

10. Lepasan sekolah-sekolah agama patutlah diberi jaminan hidup yang setimpal.

Pada keseluruhannya di dalam segala keputusan-keputusan itu adalah menitikberatkan untuk kemajuan agama diserahkan kepada kebijaksanaan atau pertadbiran kerajaan, Kebanyakkan dari syor-syor itu

adalah tuntutan-tuntutan semata-semata bagi kerajaan melaksanakannya dan dengan itu adalah menunjukkan bahawa semangat-semangat berusaha dan bekerja sendiri untuk menghidupkan pertubuhan-pertubuhan yang bekerja untuk kebijakan dan kemajuan agama tidak ada galakan sama sekali.

Bahkan bolehlah dipandang bahawa ada pula kritik daripada kertas kerja terhadap kepada usaha-usaha yang telah ada umpamanya dalam kertas kerja bahagian Pendidikan Islam. Di dalam bahagian kertas kerja itu di antara lain menyatakan di masjid dan surau pula pendudikan¹ hanya ditumpukan untuk menimbulkan semangat hidup bertuhan.

“Ditinjau dari sudut ajaran Islam hal ini sudah pasti mengecewakan sebab Islam yang memerlukan perhatian sungguh dalam soal lain yang melayakkan setiap orang untuk berbakti di bidang kemasyarakatan dan kenegaraan yang lebih luas.”

Adalah sangat menghairankan kalau seseorang Islam mengatakan bahawa pekerjaan menumpukan perhatian dari sesuatu golongan kepada usaha semangat hidup bertuhan terutamanya yang diajarkan di surau-surau dan di masjid-masjid itu sebagai kecewa. Orang-orang Islam tentu lebih mengerti dan faham bahawa tiang-tiang peribadatan adalah utama dan mesti didahulukan dan di sampingnya tidak melupakan perkara-perkara yang diterbitkan oleh keadaan dan lingkungan hidupnya tetapi tidaklah yang demikian itu sebagai suatu perkara yang dibiarkan begitu sahaja kerana terutamanya ibadah sembahyang itu menjadi tiang agama dan kalau kita tidak mengerjakannya tentulah tidak akan dapat kita untuk

mendirikan kemajuan Islam dengan wajarnya apabila kita sendiri tidak dapat menunaikan kewajipan menjadi tonggak Islam maka tentunya kita akan terkebelakang dan tidak mungkin kita akan dapat bekerja untuk yang lainnya.

Hanya sanya fahaman bertuhan dan beribadah terutamanya sembahyang itu hendaklah dilaksanakan dengan sungguh-sungguh yakin atas kebesaran dan ketinggian Tuhan supaya menguatkan jiwa di dalam perjuangan mereka. Inilah amalan-amalan yang mesti dibuat dan mesti digalakkan terutamanya oleh pemuda-pemuda yang berperasaan dan berkemahanan di dalam agama Islam. Kalau mereka sendiri tidak mengerjakannya bagaimana mereka berharap orang lain akan dapat bersama-sama dengannya menyambut seruan-Nya.

Dengan kerana itu maka amal-amal di dalam peribadatan itu sangat mustahak mesti ditaja dan dihidupkan lebih dahulu daripada yang lainnya. Umpamanya sahaja Kolej Islam, kalau kita perhatikan bahawa tidaklah berapa diambil endah soalan perhimpunan yang utama (berjemaah) di dalam melakukan perkara-perkara peribadatan itu.

Barangkali kita tidak tahu di masjid yang berhampiran dengan Kolej Islam di Petaling Jaya yang indah rupanya itu adakah ia makmur atau tidak. Tetapi sepanjang yang kita ketahui masjid yang berada di Klang yang begitu lama sudah berdiri Kolej Islam, subuh tidak menjadi perkara satu perkara yang rahsia lagi boleh dikata bahawa tidak ada penuntut-penuntut Kolej Islam yang bakal diharap untuk maju ke tengah membimbing umat kepada

agama akan bersama-sama sembahyang berjemaah di tempat itu atau memberi pertunjuk atau sekurang-kurangnya sebagai latihan bagi mereka untuk menegakkan kemahanan dan kemajuan agama Islam. Kalau ini tidak dibuat maka betapa akan diharap bahwasanya mereka akan menempa kemajuan. Bahkan inilah satu-satu dakwah yang sangat kuat dan sangat perlu ditaja supaya di dalam jiwanya timbul keyakinan yang ia patuh kepada jemaah yang dikehendaki oleh umat Islam mereka melakukannya sebab itu di dalam rencana-rencana yang seumpama ini maka berdakwah ke tempat yang hampir, di golongan yang hampir mustahak lebih dahulu diatur dan disusun serta digalakkan supaya masjid-masjid itu makmur, ertinya supaya jemaah di dalam masjid itu makmur dan terhimpunlah persaudaraan di antara sesama Islam terutamanya dapat menimbulkan cara bergaul yang baik, cara mengikat persaudaraan di antara satu dengan lain dengan tulus ikhlasnya.

Dalam seksi pertadbiran agama Islam di Malaysia, wakil dari Persatuan Pelajar-pelajar Kolej Islam Malaya telah meminta penjelasan terhadap kepada adanya agama rasmi bagi Malaysia ialah agama Islam padahal nampaknya orang-orang Islam di Malaysia hanya tinggal pada upacara-upacara sahaja dan yang demikian meragukan tugas didikan pada Islam selama ini sebagaimana yang dikatakan oleh pemimpin-pemimpin mereka.

Maka pada pengembangannya ini timbul, mungkin bagi orang-orang yang menghadiri di dalam kongres itu masih seakan-akan hendak membongkar persoalan ini. Tidak dapat dinafikan

¹ Perkataan sebenar ialah pendidikan.